

朝鮮志

檀君肇國，箕子受封，皆都平壤。漢置四郡、二府，自是三韓瓜分：馬韓統五十四國，辰、卞韓各統十二國。厥後新羅、高句麗、百濟三國鼎峙。新羅之地，東南至海，西至智異山，北至漢水；高句麗東至海，南至漢，西北踰遼河；百濟西南至海，東至智異山，北至漢。新羅滅高句麗、百濟。及其衰也，弓裔據鐵原稱後高句麗，甄萱據完山稱後百濟。高麗始祖，統合三韓，西北以鴨綠為限，東北以先春嶺為界。至我康獻王建都漢陽，定為八道，中曰京畿，西南曰忠清，其西抵大海，皆古馬韓之域，高句麗、百濟分據其地；東南曰慶尚，其東南抵大海，本辰韓之地；南曰全羅，其南抵大海，本卞韓之地，後為百濟所有；西曰黃海，其西抵大海，古朝鮮馬韓舊地，後為高句麗所有，唐高宗滅高句麗，不能守其地，新羅遂并之，及季世為弓裔所據，高麗始祖盡有其地；東曰江原，其東抵大海，本獫狁之地，後為高句麗所有；西北曰平安，西抵鴨綠江，北接靺鞨，本朝鮮故地，後為高句麗所有，新羅文、武王與唐將李勣攻滅之；東北曰咸鏡，東抵豆滿江，北接靺鞨，本高句麗之地。八道之中，忠清、慶尚、全羅三道，地廣物衆，州郡雄巨，最為富庶，俗尚詩書，人才之出，比諸道倍多；平安、咸鏡二道，境接靺鞨，俗尚弓馬，兵卒精彊。

京都[编辑]

北鎮華山，有龍蟠虎踞之勢；南以漢江，為襟帶；左控關嶺，右環渤海。

- 景福宮〈即王宮〉
- 勤政殿〈受朝正殿〉
- 思政殿〈在勤政殿北接引士大夫講論治道之所〉
- 康寧殿〈在思政殿北〉
- 交泰殿〈在康寧殿北〉
- 含元殿〈在康寧殿西北〉
- 養心堂〈在康寧殿西〉
- 丕顯閣〈在思政殿東偏夜引講官論難經史之所〉
- 麟趾堂〈在交泰殿東〉

- 紫薇堂 〈在交泰殿東〉
- 清讌樓 〈在交泰殿東〉
- 忠順堂 〈在後苑王常不忘朝廷揭此名堂以寓敬順之誠〉
- 隆文樓 〈在勤政殿東〉
- 隆武樓 〈在勤政殿西〉
- 慶會樓 〈在思政殿西環樓為池池深廣種芙蓉渠中有二島〉
- 欽敬閣 〈在康寧殿西鑄銅為山高七尺許置閣中內設巧機用玉漏水激之使自輪轉五雲繞日朝夕出沒又設司辰武士玉女及十二神之儀每時至武士擊鐘玉女奉時牌而出十二神各於方所輒自起立時盡則玉女還入神亦還伏其運若神莫測其妙山之四面陳豳風四時之景以為候象授時敬天勤民之所〉
- 報漏閣 〈在慶會樓南設座二層三神在上司時者撞鐘司更者擊鼓司點者扣鈺十二神在下各執辰牌時至自出時盡還入皆刻木為像激水為機不假人力隨時自報不差毫釐為術最妙街中鐘鼓晨昏之節皆以此傳擊〉
- 簡儀臺 〈在宮城內西北隅築石為臺繚以石欄置簡儀其巔臺西植銅表斲青石為圭圭面刻丈尺寸分乃用影符取日中之影推得二氣盈縮之端又於昌德宮西麓起瞻星臺置小簡儀觀天象察氛祲候雲物通衢之側築臺置仰釜內刻周天度數畫十二神外列方位設衡南北衡腰穿小竅以測日晷使愚民知時早晚〉
- 資善堂 〈世子引僚屬講讀之所在東宮〉
- 昌德宮 〈在景福宮東王之別宮〉
- 仁政殿 〈受朝正殿〉
- 宣政殿 〈在仁政殿東亦講論治道之所〉
- 匪躬堂 〈在延英門南〉
- 昌慶宮 〈在昌德宮東〉
- 明政殿 〈受朝正殿〉
- 文政殿 〈在明政殿南〉
- 仁陽殿 〈在明政殿西〉
- 景春殿 〈在明政殿北〉

- 通明殿 〈在景春殿北〉
- 環翠亭 〈在通明殿北〉
- 倫序亭 〈在後苑常接王親兄弟諸君之所〉
- 社稷壇 〈在京城內西〉
- 先農壇 〈在東郊〉
- 先蠶壇 〈在東郊〉
- 厲壇 〈在北郊〉
- 宗廟 〈在京城內東〉
- 文廟 〈在成均館明倫堂之南〉
- 慕華館 〈在城西郊外館前立迎詔門以寓尊敬朝廷之意〉

各司[编辑]

- 宗親府 〈宗室諸君之府〉
- 議政府 〈總百官平庶政理陰陽經邦國〉
- 忠勳府 〈諸功臣之府〉
- 儀賓府 〈尚王女者之府〉
- 敦寧府 〈王親外戚之府〉
- 義禁府 〈掌奉教推鞠之事〉
- 吏曹 〈掌文選勳封考課之政〉
- 戶曹 〈掌戶口貢賦田糧食貨之政〉
- 禮曹 〈掌禮樂祭祀宴享朝聘學校科舉之政〉
- 兵曹 〈掌武選軍務儀衛郵驛兵甲器仗門戶管鑰之政〉
- 刑曹 〈掌法律詳讞詞訟奴隸之政〉
- 工曹 〈掌山澤工匠營繕陶冶之政〉

- 漢城府 〈掌京都口帳市廛家舍田土回山道路橋梁溝渠逋欠負債鬪毆晝巡檢屍車輛等事〉
- 司憲府 〈掌論執時政糾察百官正風俗申冤抑禁濫偽等事〉
- 開城府 〈掌治舊都〉
- 忠翊府 〈原從功臣之府〉
- 承政院 〈掌出納王命為任甚重必選堪為宰相者為之由是而陞為六曹叅判及二品諸職〉
- 掌隸院 〈掌奴隸簿籍及決訟之事〉
- 司諫院 〈掌諫諍論駁之事〉
- 宏文館 〈掌內府經籍及書筵文翰之任其選最重議政府館閣吏曹共議掄揀然後方許除授更日值宿講廟治道分御膳賜宮醞以寵之〉
- 藝文館 〈掌制撰辭命〉
- 成均館 〈掌儒學教誨作成人才之任〉
- 尚瑞院 〈掌印章符牌節鉞〉
- 春秋館 〈掌在王左右書言動記特政〉
- 承文院 〈掌事大咨表文書〉
- 通禮院 〈掌朝儀排班引接〉
- 奉常寺 〈掌祭祀議諡等事〉
- 宗簿寺 〈糾察宗室愆違之任〉
- 校書館 〈掌印頒經籍及香祝印篆之任〉
- 司饗院 〈掌供御膳及內府供餉等事〉
- 內醫院 〈掌和劑御藥〉
- 尚衣院 〈掌供御衣褂及內府財貨等物〉
- 司僕寺 〈掌輿馬廐牧之任〉

- 軍器寺〈掌造兵器火炮等事〉
- 內資寺〈掌內供米糶酒醬油蜜〉
- 內膳寺〈掌諸宮殿俱進酒醪〉
- 司籩寺〈掌御廩米穀〉
- 禮賓寺〈掌賓客宴享宗宰供饋常監視議政府官飯食進案時親自助舉〉
- 司膳寺〈掌造楮貨及貢布等事〉
- 軍資監〈凡四所掌軍需儲積都中有二倉漕運所會江上有二倉〉
- 濟用監〈掌進獻紬布人參毛皮及綵染織造等事〉
- 繕工監〈掌土木營繕〉
- 司宰監〈掌魚鹽燒木柶炬〉
- 掌樂院〈掌教閱聲律〉
- 觀象監〈掌天文地理測候刻漏等事〉
- 典醫監〈掌醫藥〉
- 司譯院〈掌譯諸方言語〉
- 世子侍講院〈掌侍講經史規諷道義〉
- 宗學〈掌宗室教誨〉
- 脩城禁火司〈掌宮都城脩築宮殿公廡坊里救火〉
- 典設司〈掌帳幕排設等事〉
- 豐儲倉〈掌米豆草芻紙地等物〉
- 廣興倉〈掌百官祿俸工匠軍兵雜務廩給〉
- 典艦司〈掌京外舟艦〉
- 典涓司〈掌治宮庭〉
- 社稷署〈掌洒掃壇壝〉

- 宗廟署〈掌守衛寢廟〉
- 平市署〈掌勾檢市廛平斗斛丈尺低昂物貨〉
- 司醞署〈掌酒醞〉
- 義盈庫〈掌油蜜黃蠟素物〉
- 長興庫〈掌席子油芑紙地〉
- 冰庫〈掌藏冰〉
- 掌苑署〈掌苑囿花果〉
- 司圃署〈掌園圃蔬菜〉
- 養賢庫〈掌成均儒生供餉米豆〉
- 典牲署〈掌養犧供祭祀〉
- 司畜署〈掌飼雜畜供宴享〉
- 造紙署〈掌造表箋咨文紙及諸般紙〉
- 惠民署〈掌醫藥療民庶疾病〉
- 圖畫署〈掌繪畫之事〉
- 典獄署〈掌獄囚〉
- 活人署〈掌救活都城病人凡病人無歸者官給粥料藥物冬給燎炭夏給冰〉
- 瓦署〈掌道瓦磚〉
- 歸厚署〈掌棺槨供卿相禮葬者及士大夫賜與民庶貧乏者亦給〉
- 中學〈掌訓誨小學之士他學同〉
- 南學
- 東學
- 西學
- 中部〈掌管內檢察非法及橋梁道路里門警守家代打量人屍檢驗等事他部同〉

- 東部
- 南部
- 西部
- 北部
- 中樞府〈凡宰相或因病事故解務者授之以示優待〉
- 五衛都總府〈掌治五衛軍務〉
- 訓練院〈掌科試武士習讀武經鍊閱軍陣〉
- 世子翊衛司〈掌陪衛東宮〉
- 讀書堂〈在東湖幽靜處妙選年少文學有重望者除本職任仕務輪番而往內府書籍隨意探討使之溫習涵養以為後日大用地凡鋪設什器紙硯筆墨饌飯酒醴燈燭諸具無一不備每遣中使賜御醞珍膳以示寵異膺此選者時人擬之登蓬瀛〉

風俗[編輯]

崇尚信義，篤好儒術，禮讓成俗，柔謹為風。

士大夫喪葬祭禮，一依朱文公家禮；父母之喪率皆廬墓三年。若有不謹者，不齒士列其間，或有啜粥，終喪不食塩菜；或手自炊爨，以供奠事。

昏娶必通媒，納采不娶同姓。

士大夫皆立家廟，四時仲朔必享。忌日則子孫不食肉，祭其主於寢堂。六品以上祭三代，七品以下祭二代，庶人只祭考妣。若嫡長子無後，則眾子；眾子無後，則妾子奉祀。旁親無後者，祔祭嫡；妾俱無子者，告官立同宗支子為後。

士族婦女，夫死則守節終身。士大夫妻亡者，三年後改娶。若因父母之命，或年過四十無子者，許期年後改娶。

每歲王祀先農，躬耕籍田，以供粢盛。

王妃享先蠶，養蠶於後苑，以率女工。

每歲季秋，王行養老宴。參宴者皆除一級，孝子、順孫、義夫拜餉之。王妃宴婦人於內殿，拜餉節婦。皆有賜物：年百歲以上者歲賜米，堂上官以上年滿七十者、功臣父母妻、堂上官妻並月致酒饌。

二品以上年尊德邵者，春秋賜宴，謂之老英會。

孝友節義烈女，隨其行跡，或賞職賞物，或旌門復戶。清白吏見存者褒獎，身歿者子孫亦皆錄用。戰亡人子孫亦存恤錄用。

宗親大臣之卒，舉哀輟朝，遣官弔祭，官庀喪事。因公在外身死者，亦致賻祭。宗室雖秩卑，期親以上亦皆弔賻、營葬。侍講官及臺諫，勿論品秩高卑，一皆賻給。遭親喪者亦如之。

設歸厚署，備棺槨以周民間倉卒之需。

敗常犯贓者、婦人再嫁者，書名三司，其子孫不齒士類。

五子登科者之親，歲賜米；歿則致祭贈爵。

中文武科者賜恩榮宴其親存者則令所在官給酒樂以榮之名曰榮親宴歿則設祭謂之榮墳中第一名者賜米。

凡民因貧乏過期未葬者昏嫁失時者皆給資財饑寒孤獨者與老而無托者亦給衣料。

宏文館官員更日直宿王日開講筵宰相臺諫亦令輪參又有夜對以盡羣下之情。

官至一品年七十而係國家輕重者不許致仕賜教書几杖以優之。

堂上官實行二品以上職者視其秩追贈三代。

士大夫及軍卒父母年七十則一子歸養八十則二子歸養九十則諸子歸養。

每歲夏月頒冰於宗親及文武堂上官堂上官年老在散者活人署病刑獄囚人並給。

歷代及本國忠臣孝子烈女所行卓異者哀撰成書名曰三綱行實譯以方言廣頒中外使婦人小子無不曉解。

國中設成均館及設養賢庫常養生員進士五百人景年居館力學篤行而屢舉不中年滿五十者叙職雖非生員進士通小學四書一經者亦升補於館東西四坊各有學舍教卿大夫子弟及凡民俊秀年八歲以上者閭巷小童不得肄學者設童蒙教誨。

州郡亦設鄉校皆倣成均四學之制觀察使巡到其邑師長儒生皆試講製課勤惰以勸懲春秋釋菜觀察使守令親行之又大饗儒生。

成均館儒生每歲春秋議政府六曹諸館閣堂上官命題製述科次置簿優等者三人直赴文科覆試。

成均館升補儒生及四學諸生每年六月定考官逐日製述或講論通考優等者五十人許赴生員進士覆試諸道亦然。

世子逐日問安視膳與師傅賓客僚屬日三講論凡接師傅時下階迎送每月十五日會講必設大餉一書講畢則大設宴餉又有賜物。

新除授京外堂下官職者參謁於議政府吏曹屬曹毋過十日。

立崇義殿，以前朝王氏之後主之，給廩祿祭田，以奉其祀。

前代新羅、百濟、高句麗王陵，官禁田柴。

歷代始祖及有功德及民者，皆立廟降香祝，令所在官春秋致祭。

設厲壇於北郊，漢城府官每春秋遍祀無主孤魂，州郡亦如之。

囚人冬月則給鋪席夏月則淨脩獄中洗灑枷杻使無寒凍熏蒸之患又定醫官備藥物救之貧不能養獄者官給廩料。

京外置常平倉穀貴則增價以買布穀賤則減價以賣布以濟窮民又置別倉當春貸民以贍耕種秋償其數以備來歲每年以為常若值水旱凶歉則在在設賑濟場以救之。

郡縣每歲春秋行鄉飲酒禮又京外小民每里立鄉長家出米布使鄉長掌之春秋設酒共會以申其好謂之講信凡有疾病患難交相救護若有死喪備棺槨葬需以庇之。

曾經三品職及臺諫侍讀官者子孫承蔭每歲正月試才補官無蔭者之子孫擇其俊秀許三品以上官保舉吏曹更試經書隨才補闕若不稱職拜罪舉主。

科舉每於子午卯酉年為之設三場初場試論義二篇中場賦表二篇終場策問會試則初場講四書五經能通者許赴中場試賦表記中二篇終場策問通考取之殿試則策時務以第高下若遇大慶及王親幸學宮則有別舉。

王時時親行釋奠或不時幸學與師儒講論或橫經問難或行大射禮或親策儒生。

凡中科者殿廷唱榜御前賜酒賜花與蓋優人呈戲鼓吹前導三日遊街以榮之若幸學試取即日唱榜者拜賜鞍馬袍笏尤以為榮聖節及正至王率世子百官行望闕禮每遣使上表時王率世子百官行焚香四拜禮王親捧表跪授使者仍下庭鞠躬具黃屋儀仗以出祇送郊外我國赴京使臣或賚奉勅書回還之時結彩棚迎郊外一如華使凡進獻禮物王親自檢視。

宗親年滿十五入宗學受業每日抽籤講習讀以為課勸。

禮曹每月考講四學諸生所讀書。

京外儒生逐日所讀及其師職姓名簿錄藏於禮曹每科舉後所訓儒生中及第三人或生員進士十人以上者加階。

祭服朝服公服一依華制。

每四時八節日及季夏土旺日鑽木改火。

遺失小兒漢城府本邑保授願育人官給衣料。

古都[編輯]

- 開城府。本高勾麗東北忽高麗始祖自鐵原徙都廣州本百濟始祖溫祚王右都
(右今皆屬京畿)
- 稷山 <本慰禮城百濟始祖溫祚王高勾麗東明王第三子東明王薨避琉璃王自卒本扶餘南奔開國建都於此>
- 公州 <本百濟熊川郡文周王自北漢山城徙都至聖王移南扶餘>
- 扶餘縣 <本百濟聖王自熊川來都號南扶餘義慈王時新羅金庾信與唐蕪定方攻滅之唐師既去新羅盡得其地>
(右今皆屬忠清道)
- 全州 <甄萱建都於此稱後百濟>

- 益山〈本馬韓國後朝鮮王箕準箕子四十一代孫也避衛滿之亂浮海而南至韓地開國仍號馬韓百濟始祖温祚王并之〉
- 濟州〈本耽羅國或稱毛羅在全羅南海中〉
(右今皆屬全羅道)
- 慶州〈新羅古都始祖赫居世開國建都〉
- 高靈縣〈本大伽倻國自始祖伊珍阿豉王至道說智王凡十六世五百二十年新羅滅之〉
- 金海府〈本駕洛國或稱伽倻後改金官國自始祖首露王至仇亥王凡十世四百九十一年仇亥降於新羅〉
- 東萊縣〈古葺山國〉
- 義城縣〈古召文國〉
- 清道郡〈本伊西國〉
- 慶山縣〈本□梁國〉
- 尚州〈本沙伐國〉
- 開寧縣〈本甘文國〉
- 咸昌縣〈本古寧伽倻國〉
- 咸安縣〈本阿尸良國〉
- 固城縣〈本伽倻國并為新羅所取〉
(右今皆屬慶尚道)
- 江陵府〈本獫狁國漢武帝元封二年遣將討之定為臨屯郡〉
- 三陟府〈本女直國降於新羅〉
- 春川府〈本貊國〉
- 鐵原府〈本高句麗鐵圓郡弓裔起兵取之自松岳郡來都國號泰封〉
(右今皆屬江原道)
- 平壤府〈本三朝鮮高句麗之故都唐堯戊辰歲有神人降太伯山檀木下國人立為君都平壤號檀君是為前朝鮮周武王克商封箕子於此是為後朝鮮傳至四十一代孫準燕人衛滿奪其地都王險城即平壤是為衛滿朝鮮其孫右渠時漢武帝遣將討之以王險為樂浪郡〉

- 龍岡縣〈本古黃龍國為高句麗所并〉
- 成川府〈本沸流王松讓故都高句麗始祖東明王自北扶餘來都卒本川松讓以其國降〉
(右今皆屬平安道)

古跡[編輯]

- 面嶽〈在京都中高麗肅宗六年命崔思諷尹瓘等相南京之地思諷還言臣等就盧原驛海村龍山等處審視山水不合建都惟三角山面岳之南山形水勢符合古文請于主幹中心壬坐丙向隨形建都從形勢東至大峰南至沙里西至岐峰北至面嶽為界面岳即白岳〉
- 馬岩影殿〈在開城府成均館前高麗恭愍王為魯公主大營影殿于此窮極奢麗今有遺址〉
- 九齋學堂〈古基在府北松岳山紫霞洞高麗顯宗以後干戈纔息未遑文教文憲公崔冲收召後進教誨不倦學徒全集遂分九齋曰樂聖大中誠明敬業造道率性進德大和待聘謂之侍中崔公徒凡應舉者必詣徒中學焉及冲歿後凡赴舉者亦皆隸名九齋籍中謂之文憲公徒東方學校之興盖由冲始〉
- 滿月臺〈在松岳山下高麗延慶宮正殿前階也遺基尚存〉
- 延福亭〈古基在府東大門外山臺岩下高麗毅宗聞城東沙川龍淵寺南有石壁數仞削立臨川曰虎岩流水淙瀄樹木蓊蔚命內侍李唐柱等構亭其側名曰延福奇花異草列植四隅以水淺不可舟築堤為湖日泛舟酣晏徹夜不止羣臣皆大醉插花倒載而還或沈醉忘歸衛士甚怨率致難〉
- 歸法寺〈古基在府炭峴門外崔冲每歲暑月借此寺之僧房為夏課擇徒中及第學優未官者為教導授以九經三史間或先進來過刻燭賦詩榜其次第唱名以入設小酌童冠列左右奉樽俎進退有儀長幼有序相與酬唱及日暮皆作洛生詠以罷觀者莫不嘉歎〉

(右畿內)

- 弓樹〈在光州南門外枝幹輪困大數十圍高七十餘尺邑人以發葉早晚占年之豐歉今枯〉
- 崔氏園〈在靈岩郡西諺傳新羅人崔氏園中有瓜長尺餘一家頗異之崔氏女潛摘食之歆然有娠彌月生子其父母惡其無人道而生置之竹林居數十日女往視之鳩鷺來覆翼之還告于父母父母往見異之取而養之及長祝髮為僧名道詵入唐傳一行禪師地理之法而還踏山觀水多有神驗後名其地曰鳩林〉
- 毛興穴〈在濟州南二里高麗史古記云厥初無人物三神人從地湧出長曰良乙那次曰高乙那三曰夫乙那三人游獵荒僻皮衣肉食一日見紫泥封木函浮至東海濱就而開之內有青衣處女三及諸駒犢五穀種三人以歲次分娶之始播五穀且牧駒犢子孫蕃盛今州鎮山北麓有穴是其地也〉

(右全羅道)

- 泡母臺〈在忠州風流山高數十丈諺傳昔有仙女名薔薇自號泡母常遊其上空滿一洞唐明皇聞之遣道士迎入宮號真完夫人〉
- 天政臺〈在扶餘縣北十里許江北絕巘有岩如臺下臨江水諺云百濟時欲拜宰相則書當選者名函封置岩上須與取看名上有印跡者為相故名或稱政事岩〉
- 釣龍臺〈縣北扶蘇山下有一怪石跨于江渚石上有龍攬之跡諺傳蘇定方伐百濟臨江欲渡忽風雨大作以白馬為餌而釣得一龍須臾開霽遂渡師伐之故江曰白馬岩曰釣龍臺〉
- 落花巖〈釣龍臺西有巨岩諺傳百濟義慈王為唐兵所敗宮女奔迸登是岩自墮于江故名〉
- 蘇定方碑〈在縣西二里唐高宗遣定方與新羅金庾信伐百濟滅之立石紀功〉

(右忠清道)

- 始林〈在慶州府南新羅脫解王夜聞始林樹間有鷄鳴聲遣人視之有金色小櫝掛樹枝白鷄鳴于其下王取櫝開之有小男兒在王喜曰此豈非天遺我令胤乎乃收養之名曰闕智以其出于金櫝故姓金氏因名其林曰鷄林因以為國號〉
- 琴松臺〈在府金鰲山頂新羅人王寶高遊樂之處寶高入智異山學琴五十年自製新調三十四曲彈之有玄鶴來舞遂名玄鶴琴又云玄琴世傳寶高得仙道〉
- 鮑石亭〈在金鰲山西麓鍊石作鮑魚形故名焉流觴曲水遺跡宛然後百濟甄萱攻燒高麗府逼至郊畿時新羅景哀王與妃嬪宗戚出遊鮑石亭置酒娛樂忽聞兵至倉卒不知所為王與夫人走匿城南離宮從臣伶官宮女皆被陷沒萱縱兵大掠入處王宮令左右索王逼令自盡強辱王妃縱其下亂其嬪妾立王表弟金傳為王〉
- 瞻星臺〈在府東南新羅善德王時鍊石築臺上方下圓高十九尺通其中人由中而上下以候天文〉
- 月明巷〈在府金城南新羅憲康王遊雀城至開雲浦忽有一人奇形詭服詣王前歌舞讚德從王入京自號處容每月夜歌舞於市竟不知所在時以為神其歌舞處後人名為月明巷因作處容歌處容舞假面以戲〉
- 萬波息笛〈新羅神文王時東海中有小山浮來隨波往來王異之泛海入其山上有一竿竹命作笛吹此笛則兵退病愈旱雨雨晴風定波平號萬波息笛歷代傳寶之至孝昭王加號萬波波息笛今亡〉
- 玉笛〈長尺有九寸其聲清亮俗云東海龍所獻歷代寶之傳至於今〉
- 玉帶〈新羅真平王元年有神人降於殿庭謂王曰上帝命我傳賜玉帶王跪受几郊廟大祀皆服之〉
- 井田〈在府地新羅時遺基尚存〉

- 上書莊〈在金鰲山北高麗始祖之興新羅崔致遠知必受命上書有鷄林黃葉鵠嶺青松之語羅王聞而惡之致遠即帶家隱居伽倻山海印寺終焉其鑑識之明羅人服之乃以其所居名上書莊〉
- 皇龍寺〈在府月城東新羅真平王命所司築新宮於月城東黃龍現其地王疑之改為佛寺號曰黃龍有率居者于寺壁畫老松根幹鱗皴枝葉盤屈鳥雀往往望之飛入及到蹭蹬而落歲久色暗寺僧以丹青補之鳥雀不復至〉
- 題詩石〈在陝川郡海印寺洞俗云紅流洞洞口有武陸橋渡橋向寺而行五六里許有崔致遠題詩石其詩曰狂噴疊石吼重巒人語難分咫尺間常恐是非聲到耳故教流水盡籠山後人因名其石曰致遠堂〉
- 讀書堂〈在郡伽倻山世傳崔致遠隱伽倻山一朝早起出石遺冠履於林間莫知所歸海印寺僧以其日薦冥禧寫真留讀書堂堂之遺址在寺西〉
- 瓜亭〈在東萊縣南高麗鄭叙被譖歸田里乃築亭種瓜撫琴作歌以寓戀君之意詞極悽惋自號瓜亭其歌詞至今傳於樂譜〉

(右慶尚道)

- 棘城〈在黃州南二十五里高麗人防紅巾於此盡為賊所殲累經兵燹白骨暴野天陰雨濕鬼物煩冤薰為厲氣轉相侵染民多夭札國家春秋降香祝致祭其患遂絕〉
- 丐多窟〈在海州東三十里其窟圓徑二丈餘穴暗人持火乃入至五里許其穴屈曲幽深且有水不得窮源諺傳丐多將軍入此穴達於九月山頂之穴相距百餘里窟內燃火至十餘日則燃氣出於九月山穴〉

(右黃海道)

- 石竈
- 石池
- 石井〈俱在江陵寒松亭傍四仙游憩之時茶具也〉
- 酒泉石〈在原州酒泉縣南道旁有石狀如半破酒槽者世傳石槽舊在西川邊就而飲者無不足焉邑吏憚於往來欲轉置於縣眾共移之忽大雷震石碎為三一沈於淵一不知所在一即此石也〉

(右江原道)

- 麒麟窟〈在平壤府浮碧樓下東明王養麒麟馬於此後人立石誌之世傳王乘麒麟馬入此窟從地中出朝天石升天其馬跡至今在石上〉
- 井田〈在府外城內箕子區畫井田遺跡宛然〉
- 青雲橋
- 白雲橋〈俱在府九梯宮基內東明王時梯也〉

山川[编辑]

- 三角山〈在京畿揚州之境一名華山一名負兒岳自江原道平康縣之分水嶺連峰疊嶂起伏迤邐西至揚州西南為道峯山又為三角山實京城之鎮山也〉
- 白岳〈在京都宮城北〉
- 仁王山〈在白岳西〉
- 白雲洞〈在仁王山麓〉
- 木覓山〈即都城南山一名引慶山唐修撰皋易覓以蜜〉
- 蠶頭峰〈又名龍頭峰（《大明一統志》稱「龍山」），在楊花渡東岸即此孤立不甚高然入江心斗斷四望曠闊無礙為勝最絕故著稱焉〉
- 漢江〈在木覓山南古稱漢山河新羅時為北瀆載中祀高麗穰沙平渡其源出江陵五臺山至忠州西北與達川合至原州西與安昌水合至楊根西與龍津合至廣州界為渡迷津為廣津為三田津為豆毛浦至京城南為漢江渡自此而西流為露梁為龍山江又西為西江至衿川北為楊花渡陽川北為孔巖津至交河西與臨津合至通津北為祖江入於海〉
- 龍山江〈在都城西南十里慶尚江原忠清京畿上流漕轉皆集於此商船賈舶往來不絕〉
- 西江〈在都城西十五里黃海全羅忠清京畿下流漕轉所集之地〉
- 楊花渡〈即西江下流〉
- 楮子島〈在三田渡西江水岐為二派環島洄伏而出島上松林蒼鬱其中寬平可居石泉湧出最為幽絕〉
- 栗島〈在麻酒南時藥種栗〉
- 箭郊〈在都城東七八里許三面圍山一面帶水平蕪極目水草肥饒官馬放牧之地有亭曰華陽取歸馬華山之義〉

(右都城近處)

- 冠嶽山〈在果川西五里鎮山〉
- 青溪山〈在廣州西五十里〉
- 松岳山〈開城府鎮山又稱鵠嶺在府北五里〉

- 紫霞洞 〈在松岳山下洞府幽阻漢水清漣殊為蕭洒〉
- 進鳳山 〈在府東南內外杜鵑花盛開世稱進鳳山躑躅〉
- 天磨山 〈在府北諸峰嵒崿插天望之凝翠謂之天磨〉
- 聖居山 〈在府西北黃海道牛峯縣境與天磨山相連一名九龍山又名平那山上有五峯其峯各有小菴稱五聖昔聖骨將軍居扶蘇山右谷一日與同里九人捕鷹會日暮就宿岩竇有虎當竇口大吼十人相謂曰虎欲啗我輩試投冠使見攬者當之遂投之虎攬聖骨冠聖骨出欲與虎鬪虎忽不見而竇崩九人皆不得出聖骨還報平那郡郡人來葬九人先祀山神其神見曰予以寡婦主此山幸遇聖骨將軍欲與為夫婦共理神政請封為此山大王言訖與聖骨俱隱不現郡人因封聖骨為大王立祠祭之以九人同亡改山名曰九龍聖骨之孫寶育出家入智異山修道還居此山之北岬〉
- 大興洞 〈在天磨聖居兩山之間樹木蒼鬱泉石光潔夏則綠陰蓋地木蓮花開清香滿洞秋則赤楓黃葉倒映水底真佳境也〉
- 朴淵 〈在天磨聖居兩山之間狀若石瓮窺之正黑有盤石湧出中心曰島巖水赴絕壁怒瀑下垂可十餘丈宛如白虹映空飛雪洒缸霆奔電激聲震天地諺傳昔有朴進士者吹笛淵上龍女感之引以為夫故名朴淵其母來哭墜死下潭遂名姑姆潭淵上有神祠遇早禱雨輒應高麗文宗嘗遊此登島嶼上忽風雨暴作石震動文宗驚怖時李靈幹扈從作書數龍之罪投於淵龍即出其脊乃杖之淵水為之盡赤〉
- 五鳳峰 〈在開城府峯下有寺名曰甘露高麗李子淵入元朝登潤州甘露寺愛湖山勝致謂從行三老約曰肅宜審視形勢載胸臆間及還與三老約曰天地間凡有形者無不相似況我國山川清秀其形勢豈無與京口相近者乎汝宜以扁舟短棹無遠不尋當以十年為期三老曰唯凡六涉寒暑始得之於府城西湖潤州甘露寺雖美但營構繪飾之工特勝耳至于天作地生自然之勢殆未及此凡樓閣池臺之制度一倣潤州〉
- 禮成江 〈在府西三十里高麗朝宋皆於此發船故謂之禮成〉
- 碧瀾渡 〈在府西三十六里宋史自急水門又三日抵岸有館曰碧瀾亭由此登陸崎嶇四十餘里乃其國都者是也今稱息波亭〉
- 天寶山 〈在楊州東二十五里山有檜若寺高麗時西域僧指至到此云山水之形宛同天竺阿蘭陀之寺後僧懶翁始建寺未畢而死其徒覺田等訖工為屋凡二百六十二間棟宇像設宏狀美麗甲於東方〉
- 驪江 〈即漢江上流在驪州客館北臨江有樓曰清心沿江有長林曰八大藪周十餘里登樓望之如在畫圖中〉
- 龍門山 〈在楊根郡東三十三里一名彌智山〉
- 月溪遷 〈在郡西三十里縈紆山腹下臨江水俗稱棧道為遷〉

- 五冠山 〈在長湍府西三十里山頂有五峰團圓如冠故名高麗人事母至孝居山下去京三十里為養祿仕朝出暮返告面定省不少哀歎其母老作木鷄歌名曰五冠山曲傳于樂譜山下有靈通寺洞府深邃山勢周遭流水漫迴樹木蓊鬱其西樓勝槩為松都第一〉
- 遮日巖 〈在五冠山下綿紬洞口有巖石平廣可坐鑿石為窠曰人言古人張幕立柱處或云仙人所遊或云君王所幸有泉盤回其駛如箭其下為泓泓底皆石羣魚潑刺歷歷可數〉
- 花巖 〈在五冠山下靈通洞口一名花潭左有翠壁峭立如展畫屏岩隙有躑躅當春亂發紅映水底潭右有小崑四面如削其上四隅亦有張幕窠曰〉
- 湧巖山 〈在五冠山東北山與天磨聖居諸山相連絕壁峭立三面如削岩竅之間有寺名曰洛山惟南面獨開恍如天造寺東有一獨峰高插霄漢上戴盤石曰正瓶臺寺南又有一峯曰香爐峰成化乙酉春夜有聲如雷寺僧皆震怖明日視之則寺後石岡自折移立東門外屹然與兩峰鼎峙〉
- 寶鳳山 〈在府西二十里檜嶺東山勢如鳳鸞舞故名〉
- 石壁 〈府東三十里有長湍渡一名頭耆津即臨津上流兩岍青石壁立周遭十里清江瀉其中瑩徹可鑑春花秋楓紅綠倒影乘舟望之宛如仙境〉
- 臨津渡 〈在府南三十七里其源出咸鏡道安邊府界〉
- 扶蘇山 〈在豐德郡十五里山有敬天寺有石塔十三層刻十二會相人物聳動形容森爽其制作精巧天下無雙諺傳元脫脫丞相以為願刹晉寧君姜融募元朝工匠造此塔至今有脫脫姜融畫像又寺之東岡產怪石俗謂之沈香石〉
- 孔巖津 〈一名北浦在陽川有巖立水中有竇因以為名高麗恭愍王時有民兄弟偕行弟得黃金二錠以其一與兄至津同舟而濟弟忽投金于水兄怪而問之答曰吾平日愛兄篤今而分金忽萌忌兄之心此乃不祥之物不若投諸水而忘之兄曰汝之言誠是矣亦投金於水〉

(右京畿)

- 屏風山 〈在清風郡北一里蒼壁削立如屏周遭五六里大川縈迴其下山腰有風穴〉
- 城山 〈在永春縣南三里山下有石窟高丈餘廣可十餘尺許深入無際涯有水混混而出深可沒膝清冷如冰邑人持炬十柄而入穴猶未竟炬盡而返〉
- 椒水 〈在清州東其味如椒而冷似冰浴則已疾〉
- 俗離山 〈在報恩縣東九峰突起亦名九峰山新羅時稱俗離岳躋中祀山頂有文藏臺疊石天成巖巖聳空其高不知其幾丈其廣可坐三千人臺上有坎如鑊其中有水混混旱不縮雨不肥分為三派流沂半空一派東流為洛東江一派南流為錦江一派西流而北為達川入于金遷山下有八橋九遙之號山之南岸紆餘開豁自此至彼望之遙遙疑其地盡而至則又望遙遙如此九轉而乃抵于法住寺故名九遙九遙之中一水回環曲轉每曲有橋總八故名八橋第一橋曰水精橋橋上有飛閣人從閣中行〉

- 黃山〈一云天護在連山縣東新羅金庾信將兵與唐蘇定方攻百濟百濟將軍階伯禦羅兵于黃山之野設三營四戰皆勝兵寡力屈而死甄萱從高麗太祖討其子神劍神劍兵敗而降萱憂懣發疽數日卒于黃山佛舍〉
- 白馬江〈在扶餘縣西良丹浦及金剡川與公州之錦江合流為此江入林川郡界為古多津〉
- 藏軍洞〈在石城縣北洞門曲狹行人見之疑若無洞窺入其內極廣濶可藏萬餘兵世傳唐將蘇定方伐百濟時藏兵于此故因以為號〉
- 元帥山〈在燕岐縣南高麗忠烈王十七年哈丹侵軼王請兵于元世祖遣平章薛○干領兵來助王以韓希愈金忻等將三軍偕元兵與丹戰于縣北清州之界正左山下大捷追至公州熊津伏尸三十餘里斬獲不可勝計俗至今呼駐軍之地為元帥山〉

- 溫泉〈在溫陽郡西水熱如沸湯療病有效〉

(右忠清道)

- 開雲浦〈在蔚山郡南新羅憲康王遊崔城至海浦忽雲霧晦冥迷失道禱于海神開霽因名焉〉
- 七點山〈在三乂水之間山有七峰如點故名世傳駕洛時岳始仙人所遊之地〉
- 金井山〈在東萊縣北山頂有石高可三丈上有井圓十餘尺深七寸許有水常滿旱不竭色如黃金世傳有一金色魚乘五色雲從天而下游泳其中以此名其山〉
- 溫井〈在縣北其熱可熟鷄子帶病者飲之輒愈新羅時王屢幸于此甃石四隅立銅柱其穴猶存〉
- 內迎山〈在清河縣北山有大中小三石鼎列于岩上人稱三動石以手指觸之則微動兩手據撼則不動新羅真平王避甄萱亂于此山〉
- 龍頭山〈在寧海府西二十里其頂有井水旱無增減俗傳初山頂有一葦長至天乃鑿井其地水甚清澈邪人照之則變為泥也〉
- 冰山〈在義城縣東南四十里大巖下有石穴穴口高三尺廣四尺八寸橫入五尺一寸是為風穴又有穴在岩底直下廣一尺深可量處方一尺其下回曲深淺難量立夏後冰始凝極熱則冰堅霽雨則冰釋春秋不寒不熱冬則溫氣如春是為冰穴〉
- 鼇山〈在清道郡南二里鎮山東有一谷名曰高沙洞天將風雨先期而鳴噴出雲氣雲入洞內則雨雲出洞外則風大鳴則即日有驗小鳴則二三日乃驗〉
- 華山〈在義興縣東三十里山麓有風穴廣三尺二寸長二尺八寸風自穴出甚寒夏初必冰〉

- 洛東江〈在尚州東三十六里聞慶龍淵及軍威并川諸水至州之東北合于龍宮河豐津南流為洛東江入善山府界自此至入海雖隨地異名而總稱洛東江又稱伽倻津〉
- 恭儉池〈在州北二十七里高麗時司錄崔正份因舊址築之堤長八百六十步周一萬六千六百四十七尺民賴灌溉之利池中蓮花盛開香風聞數里菱芡被洲渚縣之士人環池岸置亭榭以遊焉〉
- 鯉埋淵〈在善山府東十二里東岸有奇岩岩下有龍穴天旱先燔柴于冷山之頂繼沈虎頭于此或祭龍以禱輒應〉
- 鳥嶺〈在聞慶縣西二十七里俗號草帖與豐基竹嶺俱為南道雄關〉
- 龍湫〈在鳥嶺下桐華院西北一里有瀑布四面及底皆石其深不可測俗傳龍騰處〉
- 曦陽山〈在縣南十五里有古城三面皆石壁古有軍倉洞府深邃泉石絕勝〉
- 串岬遷〈在縣南二十二里即龍淵之東崖一名兔遷鑿石為棧道縈紆屈曲幾六七里俗傳高麗始祖南征至此不得路有兔緣崖而走遂開路以行因稱兔遷其北斷峰有石城遺址古之防戍處〉
- 伽倻山〈一名牛頭山在陝川郡北高麗始祖將興崔致遠上書有鷄林黃葉鶴嶺青松之語新羅王惡之致遠即帶家隱于伽倻山之海印寺〉
- 吟風瀨
- 泚筆巖〈俱在海印寺洞是地攢峰四峙怒浪噴風聲如陣馬巨石臨溪苔蘚不蝕滑如磨礪可施鉛毫故名皆致遠所遊處致遠即入唐為高駢幕下作檄黃巢書者也〉
- 水落巖〈在龍川縣東十三里栗川峴山南溪水流入山腰岩石間作瀑布數十丈分三派直下垂土人以為全羅道將早則西派竭慶尚道將早則東派竭忠清道將早則中派絕流以此占來歲水旱〉

(右慶尚道)

- 萬景臺〈在全州府東南十里高德山北麓有石峯奇秀狀如層雲其上可坐數十人四面林木森鬱石壁如畫西望郡山島北通箕準城東南負太山氣象千萬〉
- 羣山島〈在萬頃縣西海中周六十里迴迂可以藏船凡漕運往來者皆候風于此島中有大塚如君王陵者（《大明一統志》）十二峯連絡如城舊有客館曰郡山亭及五龍山廟〉
- 邊山〈在扶安縣西二十五里一名瀛洲山峰巒盤回百餘里重叠高峻岩谷深邃宮室丹鉛之材自高麗皆取于此俗傳虎豹見人即避夜行無阻〉
- 無等山〈在光州東十五里鎮海一云武珍岳一云瑞石山穹窿高大雄盤五十餘里濟州漢拏山慶尚道南海巨濟等島皆在眼底山西陽崖有石條數十櫛立高可百尺山名瑞石以是也天旱欲雨與久雨欲晴山輒鳴聲聞數十里〉

- 月出山 〈在靈巖郡南五里諺稱小金剛山〉
- 九井峰 〈月出山最高頂有岩屹立高可二丈旁有一穴僅容一人從其穴而上其巔可坐二十人其平處有凹而貯水如盆者九號九井峯雖旱不竭諺傳九龍所在〉
- 動石 〈九井峯下有三石特立層岩之上高可丈餘周可十圍西負山巔東臨絕壁其重雖用千百人不能動搖而一人搖之則欲墜而不墜故亦稱靈石郡之得名以此〉
- 漢拏山 〈在濟州南二十里鎮山其曰漢拏者以雲漢可拏引也其巔有大池人喧則雲霧咫尺不辨五月雪猶在八月乃襲裘〉
- 明月浦 〈在州西六十里海口可泊舟〉
- 財巖 〈在明月浦西五里其形如屋穹窿其上鋪白沙其下有大穴人以炬入其中寬廣可八十步許產石鐘乳其西北有二岩名小夾財俱產石鍾乳其中寬廣亦五十步許〉
- 智異山 〈在南原府東六十里山勢高大雄據數千里女真白頭山之脈連延至此故又名頭流一名方丈杜詩方丈三韓外註及通鑑輯覽皆云方丈在帶方郡即南原之南者是也新羅為南岳躋中祀環山而居者凡數十州其北則咸陽其東南則晉州其西則南原奇峰峭壁不可勝筭天王峯般若峰最高山腰或有雲雨雷電其上則晴朗諺傳太乙居其上羣仙之所會龍象之所居也東南之山智異金剛最雄大山東有斷俗寺崔致遠讀書處〉
- 青鶴洞 〈在智異山中路甚隘狹纔通一線人乃曲躬而行經數里許乃得虛曠之境四隅皆良田沃壤宜播植唯青鶴棲息其中故以名焉蓋古之遁世者所居頽垣壞塹猶在諺傳崔致遠所遊處〉
- 馬耳山 〈在鎮安縣南七里有一石山雙峰聳立名曰湧出峰東曰父西曰母相對如削成高可千仞其頂樹木森鬱四面峻絕人不能升惟母峰北崖可升諺傳東峰上有小池西峰頂平濶有泉可避寇天旱禱雨有應新羅稱西多山載小祀我恭定王南幸次山下遣官致祭以形似賜名馬耳山〉

(右全羅道)

- 急水門 〈在黃州西三十里海口州及龍岡安岳之水相激處〉
- 葱秀山 〈在平山府北三十里董侍講越奉使到此作記立碑以刻〉
- 慈悲嶺 〈在瑞興府西六十里一名岬嶺自平壤通京都舊路也多虎害路遂廢今由棘城路以行〉
- 吾助川 〈在牛峰縣興義驛南源出聖居山源入楮灘岸上有石迤邐如屏高十丈餘甚奇偉〉
- 龍潭 〈在遂安郡有巖如口噴出清泉淙淙而流淵淪成深淵冬不冰旱不竭雨亦不溢崖石高起可坐五六人毫髮皆鑑穴轉而阨狀若咽喉莫敢窺其源〉

- 九月山〈在文化縣西十里即阿斯達山一名弓忽一名甌山一名三危世傳檀君初都平壤又移白岳即此山也至周武王封箕子于朝鮮檀君乃移于唐藏京後還隱此山化為神〉
- 白沙汀〈在長淵縣西五十八里長七八里廣三四里南有蓮池北有勝仙峰峰頭有莎草三面濱海白沙平鋪隨風流轉堆積成岸地產海棠紅翠相映遊賞者相屬〉

(右黃海道)

- 五臺山〈在江陵府西一百四十里東滿月南麒麟西長嶺北象王中智爐五峰環列大小均敵故名之〉
- 于筒水〈在五臺山西臺之下有泉湧出即漢水之源〉
- 仙遊潭〈在杵城郡南十一里許山麓周遭成谷谷中有潭曰仙遊有小峰斗起半入湖心上有長松數株舊有亭今廢春則躑躅夾巖亂發夏則蓴菜滿潭〉
- 永郎湖〈在郡南五十五里周三十餘里汀回渚曲巖石奇怪湖東小峰半入湖心有古亭基是永郎仙徒遊賞之地〉
- 烈山湖〈在郡烈山縣東二里有大湖周數十里包跨陵谷比諸湖最大諺傳昔大水包烈山之谷新羅構山麓而舊縣沈在水底天晴波靜則牆壁依然可見〉
- 鳴沙〈在郡南十八里沿海沙平皓若雪色人馬行則觸之有聲錚錚如金磬響大抵嶺東皆然而杵城高城之間最多海棠間發紅白相映〉
- 浦口山〈在高城郡東九里高城浦有岩斗起層疊如階其上可坐百餘人岩北又有一峯皆石東望海中五里許有石拳如列屏峯下有石龍拏虎攫奇怪異常又有二石相對如人偶語石皆白色輝映碧海望之如畫〉
- 三日浦〈在郡北七八里外有重峰疊嶂合包而內有三十六峰洞壑清淵松石奇古水中有小島蒼石盤陀其上虬松鋪陰梨花亂開湖水明瑩可鑑非烟火食者所堪至昔四仙遊此而三日不返故得是名水南又有小峯峯有石龕峯之北崖石面有丹書六字曰永郎徒南石行書畫入石風磨雨洗宛然如新世傳永郎仙徒所書〉
- 昭陽江〈在春川府北六里源出麒麟之瑞和縣與府之麒麟縣水合流至楊口縣南為草沙里灘又至府東北為青淵為丹淵為狄岩灘為昭陽江〉
- 寒溪山〈在麒麟縣東五十里山下有城有川自城中流出即成瀑布而下懸流數百尺望之如白虹垂天自圓通驛而東左右皆大山洞府深邃溪水縱橫而渡者三十六樹木如簣上竦雲霄旁無橫枝松栢尤高不見其巔又其南峰作絕壁其高千仞奇怪莫狀禽鳥不能飛度其下清泉觸巖成潭盤石平向可坐又東數里洞口甚狹細徑緣崖窾穴哈呀峰巒峭拔如龍拏虎攫如累層臺者無數其形勝甲於嶺西〉
- 金剛山〈在淮陽府東一百六十七里山名有五一日金剛二曰皆骨三曰涅擊四曰楓岳五曰怛怛白頭山南條也自會寧府之丐羅漢峴至甲山東為頭里山永興西北為劍山府之西

南為分水嶺西北為鐵嶺通川西南為楸池嶺至長楊之東高城之西為此山自分水嶺至此凡八百三十餘里山凡一萬二千峰巖嶽骨立東臨滄海杉檜參天望如畫圖有日出月出二峯可見日月之出內外山共有百八寺表訓正陽長安摩訶衍普德窟榆岫最為名刹云〉

- 萬瀑洞 〈在金剛山中百道流泉湧出谷中其狀非一故名谷口有峰曰玉人峯人言青鶴棲其隈有一泓曰觀音潭潭畔石崖蒼苔滑足人皆捉藤蔓乃得過其名曰手巾崖石心有凹如杵曰諺傳觀音浣悅處至普德窟前飛湍滌石來觸崖竅飛雪噴激晴晝欲暝石底水蔚如翠藍尺數步怒瀑飛珠散雪噴薄而下其大者凡十二層其小者不可勝計故曰萬瀑洞其下曰珠淵又有一石形如龜伏潭中曰龜潭又有一潭深不可測曰火龍潭其上有峰曰獅子岩洞有普德窟鑿絕壁架枝立銅柱于外以構小屋三楹于其上名曰觀音門拘以鐵鎖釘于巖石浮在空中人登則搖中置佛函飾以珠玉外施鐵網以防手摸〉

(右江原道)

- 龍興江 〈在永興府東北二里古名橫江其源有四一出沸流水一出馬踰嶺一出艾田峴一出陽德縣境居次嶺至庫岩與松魚灘合名橫川過龍神堂至鎮靜寺西絕壁下名鷓鴣淵下有廣灘中有白石形如白馬以石隱見知水深淺經邑城東北為此江南流入海〉
- 國島 〈在安邊府東六十里島去岸十里許入自西南隅水際白沙如練其下平地五六畝形若半壁中有屋基人言浮圖者所居也其上山圍若映勢不甚高蔓草覆之又無樹木視之一土坡也舟而少西崖岸稍異其崖石則皆方直櫛比而壁立其岸石則皆平圓排列一面可坐一人然不整齊也行數百步其屋高可數百尺其石白滑方直長短若一皆井井離立每一條其頂各戴一小石若華表柱頭者仰面而視可竦可愕有一小窟撐舟而入漸窄不能容舟視其窟深不可測其左右竦立之石如外面更整齊其上石脚下垂者皆平正如覆棋局若一一鉅而斷之又有一面如圍屏者石與窟無異而崖不甚高其下稍平易其圓石排列者可坐千人遊觀者必憩息于此東南又行數百步崖石稍異作方鐵網盛水磨小圓石長五六十尺人謂鐵網石造物奇怪難以言殫〉
- 磨雲嶺
- 磨天嶺 〈俱在端川郡以其高峻勢入雲天故名東北雄關〉
- 白山 〈在鏡城府西一百十里山勢甚峻至五月雪始消七月復有雪山頂樹木矮小土人亦謂之長白〉
- 白頭山 〈在會寧府西七八日程山几三層高二百里橫亘千里其巔有潭周八百里南流為鴨綠江北流為松花江為混同江東北流為蘇下江為速平江東流為豆滿江（《大明一統志》）東流為阿也若河疑指速平江也〉

(右咸鏡道)

- 錦繡山 〈在平壤府五里鎮山山下有高麗長樂宮基〉
- 牡丹峰 〈在錦繡山〉
- 德巖 〈在大同門外屹然能捍水故府人德之而名〉

- 酒巖 〈在府東北十里諺傳酒流出巖間遺痕尚在因而得名〉
- 大同江 〈在府東一里一名湏江又名玉城江其源有二一出寧遠郡加幕洞南流至孟山縣北又折而西流至德川郡界與三灘合而南流至价川郡界為順川江至順川郡界為城岩津至慈山郡界為禹家淵自北而東流至江東郡界為雜派灘一出陽德縣北文音山西南流至城川府界為沸流江又折而南流至江東縣界與雜派灘合流為西津江至府城東北為馬灘至府城東為銀灘又為大同江自此而西流為九津溺水下與平壤江合流至中和縣西為梨津江至龍岡縣東出急水門入海〉
- 白銀灘 〈在府東北四里〉
- 綾羅島 〈周十二里在白銀灘北〉
- 鳳德山 〈在安州東二十里山頂有九層鐵浮屠〉
- 清川江 〈一名薩水源出妙香山經安州北城下西流三十里與傳川江入海隋宇文述等伐高句麗師渡薩水去平壤城三十里因山為營因乙支文德詐降還軍至清川江軍半渡文德追擊其後軍殺右屯衛將軍辛世雄隋軍俱潰所謂隋兵百萬化為魚者此也〉
- 堂於嶺 〈在定州西十五里郭山郡界〉
- 西門嶺 〈在嘉山郡西二里俗名石門嶺〉
- 鳳頭山 〈在郡北一里鎮山〉
- 白馬山 〈在義州南三十里諺傳白龍馬出遊故名〉
- 鴨綠江 〈在州西北一名馬訾一云清河一曰龍灣西去遼東都司五百六十里其源出於長白山流至州北於赤島東分三派一南流滙為九龍淵名曰鴨綠江水色似鴨頭故名之一西流為西江一從中流名曰小西江至黔同島復合為一至水青梁又分二派一西流與狄江合一南流為大江繞威化島至暗林串西流至彌勒堂復與伏江合為大摠江入于西海朱子曰女真起處有鴨綠江傳云天下有三處大水曰黃河長江鴨綠是也高皇帝詩鴨綠江清界古封強鋤詐息樂時雍逋逃不納千年祚禮義咸修百世功漢代可稽明載冊遼征須考照遺蹤情懷造到天心處水勢無波戍不攻〉
- 龍骨山 〈一名龍虎山在平安道龍川郡東八里鎮山西臨大海北望鴨綠江江外松骨諸山如在几案之下最為絕勝〉
- 龍岩 〈在龍川郡西四十五里潮水往來岩上有龍爪痕〉
- 劍山 〈在宣川郡西二十里峰巒嵯峨如劍銳故名〉
- 凌漢山 〈在郭山郡東北七里鎮山（《大明一統志》作「熊花山」）。〉

- 妙香山 〈在寧邊府東一百三十里一名太伯山山之大莫之與比地多貞木冬青仙人舊跡存焉〉
- 博川江 〈古稱太寧江（《大明一統志》作「大定江」），在博川郡西十五里源出昌城府浮雲山過泰川縣合于安州之老江入于海〉
- 劍鶴山 〈在成川府東八里鎮山左右絕壁如劍如鶴故名〉
- 檜山 〈在成川北七十里石壁周三十里中有赤墳平衍巨川橫流其下諺稱天作之城可容千兵〉
- 絕骨山 〈在府西北二里有攢峰十二世謂之巫山十二峰〉
- 沸流江 〈即卒本川俗稱遊車衣津在成川客館西三十步其源二一出陽德縣吳江山一出孟山縣大母院洞至府北三十里合流歷絕骨山下山底有四石穴水入穴中通流沸騰西出故名沸流江又與慈山郡禹家淵合入于大同江〉
- 狄躡嶺 〈在江界府南二百六十九里熙川郡界即咸鏡道鏡城府白山西麓西北雄關〉
（右平安道）

樓臺[编辑]

- 濟川亭 〈在都城南十里許前臨漢江後據木覓南對青溪冠岳諸山〉
- 望遠亭 〈在楊花渡北岸每歲省農及觀水戰處〉
- 樂天亭 〈在都城東十餘里乃春秋省農閱武之所〉
- 七德亭 〈在漢江西白沙汀春秋講武處〉
- 狎鷗亭 〈在豆毛浦南岸上黨府院居韓明澮別墅明澮嘗奉使入中朝請名於翰林學士倪謙謙扁以狎鷗而為之記後復奉使入中朝求詩于縉紳武靖侯趙輔等數十人亭名遂聞于中朝〉
- 淡淡亭 〈在麻布東岸安平君別墅今廢〉
（右都城近處）
- 雲錦樓 〈在水原郡客館東樓前有池深廣夏月芙蕖盛開故名〉
- 清心樓 〈在驪州客館北俯臨驪江北有八丈藪西有笠岩高可二十餘丈上有松亭樓之東北五里許有神勤寺晨昏鐘磬常聞于樓中〉
- 迎賓館 〈在驪州客館東岸高爽開豁與清心樓相對俱為絕勝〉
- 臨津亭 〈在坡州臨津南岸〉

(右京畿)

- 雲錦樓 〈在江寧府客館北巋然傑特制度奇偉樓南有池深廣蒔以芙蕖池中有島島上種竹〉
- 勵節堂 〈在府館西北府使趙云侷有惠政邑人立祠祭之俗呼生祠堂〉
- 寒松亭 〈在府東十五里東臨大海蒼松鬱然亭畔有茶泉石竈石臼即述郎仙徒所遊處〉
- 鏡浦臺 〈在府東北十五里浦之周二十餘里水淨如鏡不淺不深纔没人肩四涯中央如一西岸有峯峯上有臺臺畔有煉藥石臼浦之東口有板橋曰江門橋橋外有竹島島北有白沙河周五六里許河外蒼海萬里直望日出最為奇勝亦曰鏡湖〉
- 海雲亭 〈在府鏡湖之南東臨蒼海〉
- 竹西樓 〈在三陟府客館西絕壁千仞奇岩叢列其上架樓曰竹西下臨五十川川滙為潭水清徹底日光下透遊魚歷歷可數為嶺東絕景〉
- 凌波臺 〈在府東十里海崖上有石數條立水中高可八九丈其上可坐數十人〉
- 召公臺 〈在府瓦峴山上觀察使黃喜值歲荒專心賑活民無捐瘠既還京民慕其德而相與就所憩之地累石為臺以寓甘棠之思故名〉
- 秘仙臺 〈在襄陽府北雙成湖東有峰峭拔上有虬松數株望之如畫上可坐數十人傍有細徑如線〉
- 祥雲亭 〈在府南傍海有長松連十里蒼翠成陰仰不見白日松間無雜卉惟躑躅盛開爛如紅錦〉
- 月松亭 〈在平海郡東蒼松萬株白沙如雪松間禽鳥不棲諺傳新羅仙人述郎等遊憩于此〉
- 望洋亭 〈在郡北東臨大海〉
- 萬景樓 〈在杵城郡清澗驛東有石峰突起其高數十仞上有虬松數株東構小樓臺下亂石巉岩水清徹底風至驚濤濺石〉
- 茂松臺 〈在郡明波驛南有峰聳立海濫松林蔽日望之鬱然昔有茂松府院君尹子雲奉使來遊因名焉〉
- 四仙亭 〈在高城郡北三日浦諺傳四仙來遊故名〉
- 叢石亭 〈在通州郡北有數十石柱高可八九丈離立海中石皆六稜如削玉方直平正如中繩墨者凡四處亭在海岸臨叢石故名諺傳新羅述郎南郎永郎安詳遊賞于此號稱四仙〉

- 凌虛樓 〈在蔚珍縣館東〉
- 七寶臺 〈在歙谷北有脩岡迤邐東蟠三面皆大湖湖水瀾漫外有大海小島森列海中者七故名〉
- 孤石亭 〈在淮陽府岩石竦立東臨淵水新羅真平王高麗忠肅王嘗遊此亭〉
- 錦江亭 〈在寧越郡錦障江岸繞壁之上東臨錦江南望金鳳淵虹之外有尚德村茅屋疎籬隱映桑柘間南有密積浦樹木葱鬱村烟水氣掩靄霏微望若圖畫〉
- 倚風亭 〈在旌善郡風穴之旁穴在大陰山岩石間寒氣颼颼其下置冰則經夏不消〉
- 二樂樓 〈在春川府招陽江岸景致清絕〉
- 清虛樓 〈在府西石壁削立下有澄潭〉
(右江原道)
- 倚風樓 〈在慶州府西壯麗軒豁〉
- 燕子樓 〈在金海府客館東北跨虎溪結構宏麗南有七點山三叉河一望可了〉
- 涵虛亭 〈在燕子樓北引虎溪為蓮池亭在池中極其清洒〉
- 將星樓 〈在原昌府兵馬節度使之營〉
- 撫夷樓 〈在巨濟縣左絕島中樓在縣西三十里許海岸上〉
- 萬景樓
- 海晏亭 〈皆在縣西南水軍節度使之營後據峻嶺前臨大海〉
- 風詠樓 〈在尚州客館東北壯麗開豁〉
- 大和樓 〈在蔚山郡西數里有大川南流東折而入海到樓前水尤廣濶翠岩陡斷岩隙有冬柏樹橫生側垂花間爛然東望海口雲水接天森茫無際〉
- 掣鼉亭 〈在郡東南水軍節度使營俯臨大海〉
- 雙碧亭 〈在梁山郡西城上城下有水水西有竹林水竹交映故名中朝人張清有詩〉
- 澄心亭 〈在雙碧樓之北下鑑湖水神爽氣清故名〉
- 明遠樓 〈在永州郡客館東南三面敞豁下有大川南流樓東西皆有堂東曰清涼西曰雙清〉
- 東水樓 〈在郡西清通驛東南石崖上一水合流于其南境最清幽〉

- 海雲臺〈在東萊縣東有山陡入海中若蠶頭夾路數里有冬柏杜椿松杉葱蘢蒼翠四時如一春冬之交冬柏花落深沒馬蹄東南臨大海新羅崔致遠嘗築臺遊賞遺跡尚存〉
 - 暎潮樓〈在安東府南五里江岸上高麗恭愍王南幸至府登此樓遂乘舟上下仍書額賜之額至今猶在樓上〉
 - 觀魚臺〈在寧海府東海岸上俯臨大海極目無際風定波恬臺下遊魚歷歷可數故名〉
 - 嶺南樓〈在密陽府館東山腰倚郭而構三面敞豁登覽曠然下有長江江外有大野野有栗林蒼翠極目江流屈曲蜿蜒而走隱見長林間虹明繡錯殆非人境其勝覽為嶺南第一故名樓東有望湖堂西有臨鏡軒皆極洒落〉
 - 秋月軒〈在昌寧縣館西地勢高爽三面敞豁軒北有池池中有島〉
 - 轟石樓〈在晉州客館二里許宏敞軒豁長江在其下衆峰攢于外翠壁邐迤長洲聯巨江之南涯有巨竹千挺形勝景致與密之嶺南相甲乙樓東西皆有之東堂東曰凌虛西曰臨鏡臨鏡之西又有雙清堂凌虛又有清心軒皆極清洒〉
 - 學士樓〈在咸陽郡客館西偏新羅崔致遠為太守時所建故名〉
 - 觀水樓〈在三嘉縣客館南十餘步許樓前有水樓之西偏有淨襟堂〉
 - 光風樓〈在安陰縣客館北樓前有江江外有林藪西偏有霽月堂連構景最清絕〉
 - 換鵝亭〈在山陰縣客館西俯瞰江流連構道士觀縣名山陰故取王右軍事名之〉
 - 新安樓〈在丹成縣東五里東臨大江江之東偏石崖如懸巉巉可觀〉
- (右慶尚道)**
- 快心亭〈在全州府城東南數里許沿流而上山斷水洄築石為基作亭其上〉
 - 民樂亭〈在右阜郡客館西峰上大野微茫一望無際西有海口潮水往來〉
 - 培風軒〈在興德縣客館西峯上西臨海口東望大野形勝與民樂亭相埒〉
 - 憑虛亭〈在羅州東峯上倚郭而構眺望曠遠南望月出東望無等西有錦城山又大江橫帶於前〉
 - 右犀亭〈在光州城南二里許二川合流盛夏霖雨恒有水患故用李冰守蜀時故事作石犀以鎮之二水之旁有山稍高如蠶頭構亭其上以石犀名之亭頗高爽開豁〉
 - 冬栢亭〈在茂長縣北三十里有山陡入海中三面皆水其上冬栢樹葱蘢連五六里為湖南勝地〉
 - 碧波亭〈在珍島郡東三十里郡在海島中亭當渡口俯臨大洋〉

- 聽潮樓〈在康津縣客館南南臨大海潮聲常在樓中故名〉
- 廣寒樓〈在南原府城南二里許地勢高平敞豁樓前有長川景致清絕〉
- 龍潭臺〈在平昌縣南二里許山麓有奇岩高可百尺南望無等下壓澄潭號曰龍潭臺旁有僧舍〉

(右全羅道)

- 慶迎樓〈在忠州客館東樓下有池深廣夏月芙蕖盛開〉
- 寒碧樓〈在清風郡客館東俯臨大江山水之勝最為清絕東有明月亭〉
- 聚遠樓〈在公州客館東樓西有池周五六畝種以美蕖池心有島島上有茅亭〉
- 錦江樓〈在州北五里錦江南岸當南北往來渡口景致清爽〉
- 宣化樓〈在天安郡客館東地勢穹窿眺望曠闊中朝浙東人李明昇有詩〉
- 馭風亭〈在保寧縣客館北北據高山南控大野登者如馭冷風故名〉

(右忠清道)

- 芙蓉堂〈在海州客館西有大池芙蕖盛開堂在池中極有清致〉
- 聚遠樓〈在延安府客館東，據飛鳳山，俯臥龍池。青草湖、金蓮浦在其左右，樹林隱映，雲烟變態，最為勝處。〉
- 廣遠樓〈在黃州客館東。詔使閏有記，前後詔使皆有詩。〉

(右黃海道)

- 七寶亭〈在咸興府東軒南。池中景致蕭洒。〉
- 浩浩亭〈在利城縣客館東。東望大海，前臨平野。〉

(右咸鏡道)

- 乙密臺〈在平壤府錦繡山頂，平坦敞豁，號「乙密臺」，又稱「四虛亭」。〉
- 浮碧樓〈在乙密臺永明寺東。中朝人張溥諸公皆有詩。〉
- 風月樓〈在府城中。樓下有池深廣，種美蕖。董侍講越有記。〉
- 望遠樓〈在大同江東岸。〉
- 詠歸樓〈在南浦距府城十里。夾途左右，垂楊拂地。〉
- 練光亭〈在府東城德岩上。唐內翰皋有記。〉

- 快哉亭 〈在大同館北。〉
- 百祥樓 〈在安州北城內。〉
- 迎薰樓 〈在定州客館南，舊名「定遠」。董侍講越改以「迎薰」。〉
- 納清亭 〈在州東四十里，唐內翰舉名之史，給事道記之。〉
- 敵愾亭 〈在嘉山郡大寧江上。〉
- 觀德亭 〈在龍川郡東二里。〉
- 運籌樓 〈在寧邊府城內。〉
- 決勝亭 〈在府夫伊塔津上。〉
- 偃武亭 〈在獐頂津上。〉
- 降仙樓 〈在成川府客館西，俯臨沸流江。江之西岸有十二奇峯，削立如屏，人謂之「巫山十二峯」，景致清絕。〉
- 仁風樓 〈在江界府城西